

PARTI KOMINIS MALAYA: PENUBUHAN, PERANAN DAN IMPLIKASINYA

RAMLAN HAMZAH

(Pelajar Tahun Keempat UKM)

PENUBUHAN Parti Kominis Malaya (PKM) dapat dianggap sebagai bermulanya kegiatan politik berparti di Semenanjung Malaysia. Parti yang dikuasai oleh kaum China ini, secara tidak langsung, adalah merupakan percantuman dengan anasir-anasir anarkis, yang mula muncul pada tahun-tahun 1920an.

Sebelum Perang Dunia Kedua, PKM bukanlah merupakan tenaga utama didalam arena politik tempatan. Ia hanya aktif dalam gerakan-gerakan bawah-tanah secara haram, terutama di sekolah-sekolah malam¹ dan sekolah-sekolah persendirian, pertubuhan-pertubuhan pekerja dan belia. Buat tahap ini, PKM belumlah lagi menjadi ancaman yang sebenar kepada pentadbiran kerajaan penjajah Inggeris.

Kegiatan Kominis di Semenanjung sebenarnya bermula akibat pengaruh dari Indonesia². Langkah pertama untuk menyebarkan ideologi kominis di Singapura, telah digerakkan oleh tokoh-tokoh kominis Indonesia secara *accident*, dari direncanakan. Dalam perjalanan ke Pan Pacific Labour Conference di Canton pada 1924, Alimin buat beberapa ketika telah singgah di Singapura dan menjalankan *recruitment* yang terbatas, dikalangan golongan yang radikal³.

Pada awal 1925, Tan Malaka, Ketua Perwakilan Comintern bagi Asia Tenggara, telah mendesak Parti Kominis China (CCP) di Canton supaya menghantar wakil-wakilnya guna menyusupi golongan yang radikal di Singapura. Seorang wakil khas CCP, Fu Ta-ching, telah dihantar ke Semenanjung untuk tujuan tersebut.

Kecuali dikalangan kaum Hailam, agen-agen kominis ini kurang berjaya kerana adanya saingan dari pihak Kuomintang. Agen-agen kominis Indonesia, terutama Tan Malaka, Soebakat dan Tamin dan (kemudian) Alimin dan Musso yang melarikan diri ke Singapura akibat kegagalan Pemberontakan Kominis 1926/

¹ Khoo Kay Kim, "Kominisma di Tanah Melayu: Peringkat Awal", dalam *Jurnal Sejarah*, Universiti Malaya, Kuala Lumpur, Jil. X, 1971/72, ms. 94.

² Khoo Kay Kim, "Tanah Melayu: Satu Kajian Politik 1900-1941", dalam Zainal Abidin bin Abdul Wahid (ed.), *Sejarah Malaysia Sepintas Lalu*, Kuala Lumpur, 1971, ms.99. Tetapi Ryan pula berpendapat kominisma masuk ke Semenanjung pada akhir tahun-tahun 1920an, dibawah naungan cabang-cabang Parti Kuomintang China yang didirikan disini. Sehingga 1925, Kuomintang adalah organisasi yang sah, dan dibawah lindungannyaah agen-agen kominis itu masuk ke Semenanjung. Selanjutnya, lihat N.J. Ryan, *Sejarah Semenanjung Tanah Melayu*, Kuala Lumpur, 1966, ms.205.

³ G.Z. Hanrahan, *The Communist Struggle in Malaya*, Kuala Lumpur, 1974, ms. 28. Sedangkan menurut Mc Vey, mungkin Tan Malaka dan bukan Alimin yang mula-mula sekali menganjurkan supaya kegiatan-kegiatan kominis disebarikan di Semenanjung. Lihat Ruth Mc Vey, *The Rise of Indonesian Communism*, New York, 1965, ms. 449.

27 di Jawa, berusaha melakukan agitasi dikalangan orang-orang Melayu (keturunan Indonesia). Tetapi usaha mereka ini tidak menampakkan kejayaan yang diharapkan.

Selepas berlakunya perpecahan Parti Nasionalis dan Parti Komunis di negeri China, diantara bulan November 1927 dan Januari 1928, lima orang agen CCP tiba di Singapura untuk menubuhkan Nan-yang-kung-ch'an-tang (South Seas Communist Party). Parti ini akhirnya dibubarkan oleh Kongres Perwakilan Ketiga South Seas Communist Party pada April 1930, dan digantikan oleh penubuhan Parti Komunis Malaya (PKM).

Pada ketika itu, PKM dikuasai oleh Far Eastern Bureau of the Comintern. Diantara lain, (seperti yang termuat dalam resolusi Pan-Malayan Cadres' Meeting 1931, di Singapura), PKM telah memutuskan,

"To carry on the struggle for national liberation, formulate a military programme for the overthrow of imperialism and feudal aristocracy and to establish the Soviet Republic of Malaya by the co-ordinated efforts of the proletariat and peasantry".⁴

'Period of organisation' PKM dapat dikatakan bermula dengan pembentukan Communist Youth League (CYL) pada 1926 di Singapura, yang kemudian meluaskan kegiatannya ke Semenanjung. PKM menjadikan sekolah-sekolah persendirian dan sekolah-sekolah malam China sebagai markas penyebaran ideologi komunis. Gerakan propaganda PKM ini telah berjaya mempengaruhi terutamanya belia-belia dan pelajar-pelajar yang radikal.

Tarikh terpenting bagi PKM ialah apabila Jawatan Kuasa Pusatnya (JKP) meluluskan perlembagaan parti didalam Sixth Plenary Session Meeting, pada 6 Mac 1943. Tetapi sebelum tarikh tersebut, pergerakan PKM sedikit terjejas apabila seorang agen Comintern Perancis, Joseph Ducroux⁵, ditangkap oleh Inggeris di Singapura pada bulan Jun 1930. Berikutan dari penangkapan tersebut, pehak berkuasa Inggeris berjaya pula memberkas 14 pemimpin kanan komunis⁶.

Pada tahun-tahun tersebut, jelaslah bahawa PKM sangat cergas dalam gerakan kesatuan pekerja-pekerja, terutama dalam usaha membangkitkan permogokan

⁴ Wu Tien-wang. "The Communist Party of Malaya", (manuskrip tidak diterbitkan, 1947?), dipetik dari Hanrahan, *op. cit.*, ms. 43.

⁵ Ducroux juga dikenali sebagai Serge Lefrance, tiba secara rahsia di Singapura pada 27 April 1930, untuk "...conducting a thorough survey of the Malayan position and the establishment for it of direct communications with the Pan-Pacific Trade Unions Secretariat in Shanghai, the reorganisation of the Red Labour Unions, the Payment of subsidies to the Malayan Communist Party, the Malayan Trade Unions, the Communist Youth Organisation and finally 50,000 gold set aside by the Pan-Pacific Trade Unions Secretariat for work in Malaya Burma", selanjutnya, lihat Rene Onraet *Singapore: A Policeman Background*, London, 1947, ms. 113.

⁶ Antara yang ditangkap ialah Setiausaha Seamen's Union, Setiausaha Malayan Labour Union dan Setiausaha Chinese Labour Union, kesemua Union ini adalah 'Red-dominated labour group'. *The Straits Times*, 28 Oktober 1929, juga melapurkan 'according to a recent visitors here from China, a number of Chinese who were recently banished from here were shot. The eleven Hylams (sic.) who had acted as teachers in Singapore and whose (sic.) schools were declared unlawful were also executed'.

pekerja⁷. Ini menjadikan kerajaan bertindak tegas menekan kesatuan-kesatuan pekerja, diantaranya menerusi Banishment Ordinance. Dibawah Ordinance ini, 20 pegawai kanan PKM yang bergiat dalam kesatuan-kesatuan pekerja dibuang negeri pada 1937⁸. Dan pada 1940 pula, kerajaan meluluskan Trade Unions Enactment, guna mengawal kegiatan kesatuan-kesatuan pekerja. Ini menjadikan kepopularan PKM merosot sedikit.

Sehingga 1939, PKM dibawah pimpinan Lai Teck, dikatakan berjaya menarik 37,000 ahli di Malaya, sementara 18,820 lagi di Singapura. JKP yang mengendalikan keseluruhan pentadbiran PKM ditubuhkan di Singapura, dengan cawangan-cawangannya berpusat dibandar-bandar seperti Kuala Lumpur, Melaka, Pulau Pinang, Seremban, Ipoh, Batu Pahat, Muar dan Kuantan.

Perubahan politik antarabangsa yang berlaku menjelang Perang Dunia Kedua, secara langsung mahupun tidak langsung, telah mempengaruhi Semenanjung. Serangan Jepun keatas negeri China, sehingga ujudnya pergabungan (bersama) perjuangan golongan Nasionalis dan Kominis, mempengaruhi penyokong-penyokong kedua-dua parti tersebut disini. Mereka bertindak dengan membentuk pertubuhan-pertubuhan anti-Jepun⁹.

PKM berjaya menubuhkan Overseas Chinese Anti-Japanese National Salvation Association, dan kemudian berjaya menguasai Proletarian Arts League dan Proletarian Writers' Association. Sementara golongan Nasionalis pula menubuhkan Union of Overseas Chinese, yang bersifat sangat anti-Jepun. Namun demikian, PKM akhirnya berjaya meresapi Union ini dan menukarnya kepada Malayan Anti-Imperialist League.¹⁰

Dengan meletusnya Perang, PKM bertindak menurut garis perjuangan sepertimana yang dirangka oleh pakatan Nazi-Soviet: mengambil bahagian dalam kempen propaganda anti-British dan melakukan agitasi ekonomi menerusi gerakan permogokkan pekerja-pekerja. Setelah polisi ini dilaksanakan, nyatalah ianya mengurangkan sokongan terutama dari kaum China yang konservatif. Mereka lebih cenderung membantu gerakan pertubuhan-pertubuhan anti-Jepun.

Tetapi selepas Jerman menyerang Russia pada bulan Jun dan Jepun menguasai Indo-China pada bulan Julai 1941, PKM mengubah taktik perjuangannya. Mereka

⁷ Dalam setiap permogokkan pekerja ini, Nanyang Federation Labour Union yang ditubuhkan pada 1926, memainkan peranan penting. Diantaranya, Union ini menggerakkan demonstrasi Incident of March 12, di Singapura pada 1927, permogokkan Singapore Transport Company, permogokkan oleh pembuat-pembuat kasut China dan 2,000 buruh China di Singapura pada 1928, permogokkan pekerja-pekerja di Batu Arang, Selangor, pada 1935, dan permogokkan pekerja-pekerja kilang nenas dan buruh-buruh industry pada 1936. Untuk perbincangan lanjut, lihat Hanrahan *op. cit.*, 33-36, 52-53; dan pada umumnya R. Clutterbuck, *Riot and Revolution in Singapore and Malaya 1945-1963*, London, 1973.

⁸ V. Thompson, R. Adloff, *The Leftwing in Southeast Asia*, New York, 1950, 128. Pada tahun 1948 misalnya, 606 orang China telah dibuang negeri. Bilangan ini meningkat kepada 10,300 pada 1949.

⁹ Lam Swee, *My Accusation*, Kuala Lumpur, 1951, ms. 3.

¹⁰ Liga ini kemudiannya ditukar menjadi All-Malayan Races Liberation League pada 1937 dalam usaha PKM menarik sokongan lain-lain kaum. Ia juga kemudiannya dikenali sebagai Racial Emancipation League.

menawarkan kerjasama kepada Inggeris¹¹, bagi menghadapi kemaraan Jepun. Tawaran PKM ini di sampaikan melalui ketua gerakan anti-Jepunnya, Ch'en Chia-keng.

Pada 19 Disember 1941, PKM membentuk Malayan Overseas Chinese Anti-Japanese Mobilization Society, yang dipengerusikan oleh Ch'en Yang-ching dan bertujuan untuk menarik sokongan dan simpati kaum China. Di Singapura, sekum-bulan 15 orang telah membentuk Anti-Japanese Mobilization Committee untuk membentuk satu tenaga ketenteraan bagi membantu mempertahankan Singapura¹².

Apabila Jepun mara ke Singapura, Inggeris segera membebaskan tahanan-tahanan politik kiri dari penjara pada 15 Disember. Pada hari berikutnya, satu rundingan sulit diantara Lai Teck, setiausaha agong PKM, dengan wakil Inggeris, Major Chapman, telah diadakan. Wakil PKM itu bersetuju membekalkan belia-belie China mengikuti latihan ketenteraan di 101 Special Training School (101 STS) yang ditubuhkan di Singapura.

Dengan kekalahan Inggeris, pihak berkuasa tentera Jepun telah bertindak menghapuskan pemimpin-pemimpin dan ahli-ahli PKM¹³. Sungguhpun demikian, PKM dalam mesyuaratnya di Singapura, pada bulan Februari 1942, telah meluluskan program empat dasar yang akan dilaksanakan sepanjang masa pemerintahan Jepun, iaitu:

1. menyatukan seluruh rakyat dan membantu Inggeris menentang Jepun,
2. mempersenjatai ahli-ahli parti dan golongan massa,
3. menghapuskan semua agen musuh dan pengkhianat,
4. menghalang Jepun dari dapat mengesan dan memperolehi rahsia pergerakan PKM.

Sementara itu, 165 orang gurila lepasan 101 STS berjaya membentuk Malayan People's Anti-Japanese Army (MPAJA). Unit pertama MPAJA berpindah ke Semenanjung dan menjalankan operasinya di utara Kuala Lumpur dan Selangor Utara. Pada bulan Mac 1942, Unit ini dijadikan "First Independence Force of the MPAJA."

Unit kedua menjalankan gerakannya di Negeri Sembilan. Pada 7 Jun 1942 Unit ini berjaya menyerang ibu pejabat polis Kuala Pilah. Unit ini kemudiannya menjadi Second Independence Force. Unit ketiga (seramai 360 orang) yang kemudiannya menjadi Third Independence Force, bergerak di kawasan Johor Utara.

¹¹ S. Chapman, *The Jungle is Neutral*, New York, 1949, ms. 29.

¹² Tenaga penggerak utama sehingga Committee ini terbentuk, datangnya dari PKM. Ia merupakan pasukan sukarela China, yang juga dikenali sebagai DALFORCE, dan dikatakan mempunyai ahli diantara 1,000 dan 2,000 orang. Committee ini diketuai oleh Tan Kah-hee, seorang ahli Chinese National Party yang tinggal di Singapura.

¹³ Misalnya, semasa mesyuarat JKP PKM di Batu Cave, Selangor pada 1.9.1942, 20 orang pemimpin PKM telah dibunuh oleh Jepun, sementara 70 orang yang lain ditangkap. Antara yang dibunuh itu ialah Hsio Chung, anggota JKP PKM; Chu Wei, 'political commissar' 4th. Independence Force; Ho Fu, 'Commander' 4th. Independence Force; Hsio Cheng, anggota JKP bahagian Selangor; Ch'en Su, 'political commissar' 2nd. Independence Force dan Tsu Pu-pin, 'political commissar' 1st. Independence Force.

Unit keempat dan terakhir yang dijadikan Fourth Independence Force, bergerak di kawasan Johor Selatan, untuk tujuan mempertahankan Singapura. Sementara Perak Military Affairs Committee yang dikuasai oleh PKM, telah dijadikan Fifth Independence Force pada bulan Disember 1942. Unit-unit inilah yang akan menjadi teras National Defence Army, sekiranya PKM berjaya menegakkan apa yang mereka namakan Soviet Republic of Malaya itu.

Pegawai-pegawai MPAJA pula mendapat latihan di People Academy of Sixth Independence Force, yang ditubuhkan di Pahang pada bulan Ogos 1943, dibawah pimpinan Ch'en Kuang.

Apa yang jelas sehingga tahap ini, perjuangan PKM lebih ditumpukan kepada cabang ketenteraannya yang diletakkan dibawah Central Military Committee dan diketuai oleh Lau Yeh. Hanrahan menganggap tahap ini lebih merupakan jangka waktu perjuangan politik PKM¹⁴. Jangkawaktu perkembangan politiknya hanya bermula apabila lahirnya Fifth Independence Force (pada Disember 1942), Sixth Independence Force (pada Ogos 1943) dan Seventh Independence Force (pada September 1944).

Menjelang kekalahan Jepun pada Ogos 1945, PKM menubuhkan unit-unit rahsia dan pusat-pusat bekalan (makanan dan senjata). MPAJA mendapat bantuan senjata, latihan ketenteraan, bekalan makanan, perubatan dan keuangan dari Pihak Berikat yang disalurkan menerusi FORCE 136¹⁵. Bantuan-bantuan ini diperolehi berikutan dari rundingan diantara Chung Hung dan seorang lagi wakil dari markas MPAJA dengan Major Chapman dan Captain Davis, ketua SEAC bagi Semenanjung.

Setelah Jepun menyerah kalah dan sementara Inggeris mengambil semula kuasa, PKM dan MPAJA keluar lalu mengambil pemerintahan. Sebaik sahaja muncul dari hutan, mereka melakukan penganiayaan disana sini, kononnya terhadap orang-orang yang telah melakukan kesalahan jenayah kepada rakyat, selain daripada mereka yang bersubhat dengan Jepun¹⁶.

Selama 3 bulan dalam masa peralihan itu, mereka mengadakan perbincaraan sendiri, melakukan kezaliman, membunuh ramai orang Melayu dan China dan mengancam seluruh penduduk dimana mereka bermaharajalela. Kezaliman tersebut memuncak kepada pergaduhan yang besar apabila orang-orang Melayu mengambil tindakan balas terhadap orang-orang China di kawasan luarbandar¹⁷.

Apabila Pentadbiran Tentera British (BMA) menguasai semula Semenanjung, PKM terdesak dalam dua polisi yang bertentangan: sama ada meneruskan perjuangan gurila (seperti di negeri China), atau kembali kepada gerakan agitasi untuk mencapai cita-cita politiknya, seperti sebelum Perang dahulu.

JKP PKM pimpinan Lai Teck bertindak menurut polisi kedua. Unit-unit 'terbuka' MPAJA dihapuskan, dengan menyerahkan sebahagian daripada senjata-

¹⁴ Hanrahan, *op. cit.*, ms. 71.

¹⁵ N.I. Low, *This Singapore*, Singapore, 1946, ms. 57-70. Lihat juga Chapman, *op. cit.*, chapter 12, dan Hanrahan, *op. cit.*, ms. 77-83.

¹⁶ Majlis Gerakan Negara, *Trajedi 13 Mei: Satu Laporan*, Kuala Lumpur, 1969, ms. 7.

¹⁷ *Ibid.*, ms. 8.

nya pada bulan Disember 1945, sebagai menyahut tawaran kerajaan¹⁸. Unit 'rahsia'nya memulakan kegiatannya menerusi Malayan People Anti-Japanese Ex-Services Comrades' Association, dan menubuhkan cawangan-cawangannya diseluruh negara.

Apabila berlaku perubahan polisi Soviet terhadap Kuasa-Kuasa Barat, semasa komunis menegakkan pengaruhnya di Eropah, PKM tidak lagi bersifat anti-British yang melampau. PKM mula menunjukkan minat dalam pergolakan politik tanahair. Pada September 1945, PKM mengemukakan "Eight Proposals and Six Suggestions" kepada kerajaan, tetapi gagasan tersebut kemudiannya ditolak.

Sekali lagi pada 7 Noverber 1945 JKP PKM mengemukakan kepada kerajaan satu proklamasi yang menuntut: perlembagaan yang demokratis; hak kebebasan bagi pertubuhan-pertubuhan politik; hak 'self-determination' bagi rakyat; hak untuk berkerajaan sendiri; pembentukan All-Malayan Congress; hak mengundi bagi rakyat yang berumur lebih dari 18 tahun; dan hak yang lebih besar kepada kaum wanita. Proklamasi ini juga menerima nasib yang sama seperti gagasannya dahulu.

Perjuangan PKM maju setapak lagi apabila pada Januari 1946 Eight Enlarged Plenum of Central Executive Committeeny meluluskan apa yang didakwanya sebagai dasar yang moderet. Tetapi polisi ini terpaksa digantikan dengan 'Nine Points Programme', yang dianggapnya lebih demokratis lagi.

Dalam usaha Inggeris menjajah semula Semenanjung selepas Perang, PKM menjadi tenaga penggerak utama dalam cantuman golongan kiri PUTERA-AMCJA¹⁹, guna menentang gagasan Malayan Union yang keji dan Perlembagaan Persekutuan Tanah Melayu 1948. Dalam hubungan ini, Stenson berpendapat bahawa "... as the result of the serious challenge to British Authority and rule mounted by MCP from September 1945, the British Government for the first time saw the necessity of a local base of mass support to underpin its regime in

¹⁸ Sebagai daya penarik, mereka yang menyerah diri menerima bonos \$350 dan satu beg beras dari Kerajaan. Adalah dikatakan sejumlah 6,000 gurila yang menyerah diri, 500 daripadanya tidak menyerahkan senjatanya. Menurut laporan Kerajaan pula, 20% daripada senjata yang digugurkan oleh FORCE 136, tidak diserahkan kembali kepada Kerajaan. Ini merupakan sebahagian daripada kelengkapan senjata apabila PKM melancarkan pemberontakan bersenjata pada 1948 itu. Selanjutnya, lihat Hanrahan, *op.cit.*, ms. 90-91. Sementara *The Straits Times*, 21 Oktober 1945 pula melapurkan, "... seriously concerned at this increase in cases of robbery and gang robbery with arms".

¹⁹ AMCJA merupakan suara kaum bukan Melayu, ditubuhkan pada 22.12.1946, dengan Tan Cheng Lock selaku pengerusinya. Pertubuhan ini mendakwa mewakili 40,000 ahli, yang diantaranya, terdiri dari Malayan Democratic Union (MDU), Malayan Indian Congress (MIC), Malayan New-Democratic Youth League (MNDYL), MPAJ Ex-Services Comrades' Association (MPAJESCA) dan Pan-Malayan Federation of Trade Unions (PMFTU). Adalah dikatakan bahawa MDU, MNDYL, MPAJESCA dan PMFTU telah diresapi ataupun merupakan pertubuhan barisan hadapan PKM. Sementara PUTERA pula terdiri dari Parti Kebangsaan Melayu (MNP) pimpinan Dr. Burhanuddin Al-Helmy dan Ishak Haji Muhammad, Angkatan Pemuda Insaf (API) pimpinan Ahmad Boestaman dan Angkatan Wanita Sedar (AWAS) pimpinan Shamsiah Fakeh, dan mendakwa mewakili 150,000 ahli (orang-orang Melayu yang berfahaman kiri), selanjutnya, lihat Mohammad Noordin Sopiee, *From Malayan Union to Singapore Separation, Kuala Lumpur, 1974*, ms. 39 dstnya.

Malaya"²⁰. Oleh itu gagasan Persekutuan Tanah Melayu itu perlu disegerakan.

PUTERA-AMCJA pula sebaliknya, telah mengemukakan Usul-Usul Perlembagaan Rakyat Bagi Tanah Melayu, yang telah digubal dan diluluskan oleh Persidangan Perwakilan mereka pada bulan Julai dan Ogos 1947. Usul ini tidak langsung diambil indah oleh Kerajaan.

Buat tahap seterusnya, PKM kembali bergerak secara licin (seperti sebelum Perang dahulu) meresapi pertubuhan-pertubuhan pekerja, belia dan wanita. Dibidang ini, PKM lebih berjaya menguasai General Labour Union²¹, yang mulai bulan Februari 1946, diubah menjadi Pan-Malayan Federation of Labour Union (PMFLU)²².

Perkembangan yang berlaku menjelang tahun-tahun 1950an, telah menambahkan lagi kematangan politik Semenanjung. Ini memberikan harapan kepada PKM untuk lebih bergiat sebagai sebuah parti politik yang signifikan. Ahli-ahli PKM yang lebih militan tidak lagi menyakini 'polisi perdamaian barisan bersatu'. Mereka juga menentang penggelapan dan penyalahgunaan wang parti oleh pegawai-pegawai tinggi PKM (termasuk Lai Teck, yang juga dituduh berpoligami, mendorong kehidupan bobrok dan menyalahgunakan wang. Inilah diantara perkara-perkara yang telah membangkitkan krisis dalam parti).

Ch'in Peng yang mengetuai golongan kedua (yang militan) itu, telah mengambil tindakan sehingga mendorong penyingkiran Lai Teck, dari jawatannya dalam mesyuarat JKP pada 6 Mac 1947, dan menjadikan dirinya Setiausaha Agung yang baru.

Apabila Cominform ditubuhkan pada bulan September 1947, Moscow telah membatalkan perjanjiannya dengan Pihak Berikat yang dibuatnya semasa Perang dahulu. Taktik perjuangan bersama bagi rantau Asia Tenggara telah dibincangkan dalam dua persidangan yang diadakan di Calcutta, pada bulan Februari 1948, iaitu Asian Youth Congress (Congress ini dipengaruhi oleh World Federation of Democratic Youth, dan dikuasai oleh Russia) dan Second Congress of the Communist Party of India²³.

Lawrence Sharkey, seorang pemimpin komunis Australia, telah singgah di Singapura dalam perjalanan pulang dari Calcutta untuk menyampaikan resolusi Congress tersebut kepada PKM. Resolusi tersebut, mendesak supaya PKM memulakan satu pemberontakan bersenjata selaras dengan pemberontakan yang

²⁰ M.R. Stenson, *Industrial Conflict in Malaya: Prelude to the Communist Revolt of 1948*, London, 1970, ms. 128. Lihat juga, pada amnya, F.S.V. Donnison, *British Malaya Administration in the Far East 1943-1946*, London, 1956, ms. 392 dstnya.

²¹ *The Straits Times*, 22 Oktober 1945 melapurkan bahawa permogokan oleh 7,000 pekerja pelabuhan Singapura berlaku pada 21.10.1945. Lihat juga *The Straits Times*, terbitan 26 Oktober 1945 dan 15, 18 dan 19 Februari 1946 untuk mengetahui permogokan yang lain.

²² PMFTU menguasai 214 daripada 277 kesatuan pekerja yang didaftarkan ketika itu. Pada kongres pertamanya, PMFTU mendakwa mewakili 436,000 pekerja, kebanyakannya dari kesatuan pekerja-pekerja lombong, estet dan 'longshoremen's unions'. Lihat A. Shucliff, "The Growth of Democratic Trade Union", dalam *Federation of Malaya, Labour Monthly Review*, September 1951, ms. 274.

²³ *Communism in Malaysia and Singapore*, (Tanpa nama pengarang dan penerbit), 1971, ms.9.

seumpamanya, bagi seluruh Asia Tenggara²⁴.

'Polisi perdamaian barisan bersatu' yang memandu perjuangan PKM selama ini, digantung oleh mesyuarat JKP pada bulan Mac 1948. Polisi baru yang dilaksanakan ialah cuba mempengaruhi golongan massa untuk menentang imperialis Inggeris. Sebahagian besar dari organisasi PKM sendiri, digerakkan untuk mengendalikan pemberontakan bersenjata tersebut.²⁵

Sebagai langkah pertama, secara sulit PKM menukarkan MPAJA kepada Malayan Peoples' Anti-British Army. Keganasan bermula pada bulan Mei dan pada 17 Jun 1948, Undang-Undang Darurat diistiharkan di Perak, yang akhirnya meliputi seluruh Semenanjung pada hari berikutnya. Itulah bermulanya darurat di Semenanjung²⁶.

Apabila polis menggelidahkan pejabat-pejabat PKM pada 20 Jun 1948, dikatakan seramai 4,000 hingga 5,000 ahli-ahli PKM telah menghilangkan diri ke hutan-hutan, untuk mengendalikan pemberontakan tersebut. Pada masa yang sama, balaipolis Mentakab, Pahang telah diserang²⁷. Laporan mula dibuat oleh kerajaan mengenai kegiatan membunuh dan kematian, terutama di estet-estet²⁸.

Pada 1 Februari 1949, bahagian ketenteraan PKM diubah menjadi Malayan Races Liberation Army (MRLA), untuk menarik simpati orang-orang Melayu dan India menyertai pemberontakan tersebut. Adalah dikatakan bahawa regimen kesepuluh MRLA dianggotai oleh golongan sayap kiri Melayu yang kebanyakannya berasal dari Indonesia.

Dalam mengendalikan pemberontakan tersebut, PKM menggerakkan jentera perjuangannya berlandaskan strategi yang telah dilaksanakan oleh Mao Tze Tung di negeri China. Ini terbukti dari kandungan dokumen yang disebarikan pada bulan Disember 1948, berjudul 'Strategic Problems of the Malayan Revolutionary Wars²⁹'.

²⁴ Pemberontakan yang sama telah dilakukan oleh Parti Komunis di Indonesia, Huk-balahap di Filipina, Viet-Minh di Indo China.

²⁵ Malcolm MacDonald, Pesuruhjaya Tinggi British, mengakui bahawa pemberontakan di Semenanjung itu berlaku kerana adanya tekanan dari Komunis Antarabangsa. Lihat *The Straits Times*, 27 Oktober 1948. Juga H. Miller, *The Story of Malaya*, London, 1956, ms. 6., dan Li Chuan Siu, *Ikhtisar Sejarah Pergerakan dan Perkembangan Kesusasteraan Melayu Modern*, Kuala Lumpur, 1967, ms. 99.

²⁶ Satu teori lain tentang sebab berlakunya darurat pernah dikemukakan, bahawa kegagalan PKM untuk mencapai tujuannya melalui cara-cara perlembagaan telah mendorong melakukan kekerasan, lihat Zainal Abidin bin Abdul Wahid, "Darurat: Akibat-Akibatnya", dalam Zainal Abidin bin Abdul Wahid (ed.) *op. cit.*, ms. 132. Noel Barber pula menyatakan bahawa krisis dalam PKM sendiri, telah memaksa Ch'in Peng dan ahli-ahli JKP PKM melakukan pemberontakan, lihat Noel Barber, *The War of the Running Dogs*, Fontana, 1974, ms. 32: sedangkan Komer berpendapat bahawa PKM telah merancang "to unite with Soviet and China to support the independence", kegagalan PKM untuk mencapai cita-cita ini, menjadikannya tidak punya jalan lain, selain dari membangkitkan pemberontakan bersenjata, selanjutnya lihat W. Komer, *The Malayan Emergency in Retrospect: Organisation of Successful Counter-insurgency Effort*, Randolph, 1965, ms. 8.

²⁷ V. Purcell, *The Chinese Malaya*, Singapore, 1960, ms. 48.

²⁸ V. Purcell, *Malaya: Communist or Free?*, California, 1955, ms. 61.

²⁹ Strategi ini akan digerakkan dalam tiga tahap: "First: administration of the country was to be undermined by guriella raids on rubber plantations, tin mines, and police outposts, second: the government was to be deprived of effective control of all but the main towns and line communication, third: the party was to establish 'liberated areas' in the districts under its control, from which it would gradually extend over the whole country", selanjutnya lihat *Communism., op. cit.*, ms. 10; juga Hanrahan, *op. cit.* ms. 109.

Adalah jelas, kegagalan PKM menyesuaikan strategi Mao dengan keadaan yang ada di Semenanjung mendorong gagalnya pemberontakan itu. Kegagalan Russia menyalurkan bantuan dari Kominis Antarabangsa kepada PKM, sikap inferioriti pemimpin-pemimpin dan kegagalan PKM sendiri memahami kedudukan Semenanjung adalah diantara sebab-sebab yang lain pula.

Menurut Politburo PKM (dalam 'supplementary view'nya pada 1949) bahawa pemberontakan 1948 itu adalah tepat dan benar-benar berdasarkan kepada konsep ketenteraan Mao, tetapi analisis yang mereka buat kurang detail. Memandangkan keadaan huruhara ketika itu, sangat sukar bagi PKM untuk menubuhkan pusat-pusat gerakan di kampung-kampung.

Lokasi terbaik bagi menempatkan 'tentera pembebasan' PKM itu ialah di kawasan perpinggiran hutan supaya hubungan dapat dibuat dengan kawasan-kawasan yang berpenduduk untuk mendapatkan bantuan, terutama dari setinggan-setinggan China yang melarikan diri semasa pendudukan Jepun dan zaman Kemelesetan Besar dahulu³⁰. Setinggan-setinggan itu akan terpaksa berkorban demi kepentingan dan keselamatannya yang tentunya berfaedah kepada PKM sendiri.

Tetapi kekecewaan PKM mulai terbayang dan menjadikannya lebih terdesak apabila Rancangan Briggs bagi mengumpul dan menempatkan semula setinggan-setinggan tersebut di kampung-kampung baru, dimulakan pada tahun 1951³¹. Dengan terlaksananya Rancangan ini, menampakkan kegagalan kempen PKM yang hanya mendapat bantuan kecil menerusi tindakan kekejaman mereka.

Menyedari kegagalan dan penderitaan yang dialami selama ini, Politburo PKM mulai 1 Oktober 1951, mengubahsuaikan taktik perjuangannya selaras dengan perkembangan-perkembangan yang berlaku di rantau ini. Mereka meluaskan pusat-pusat massa, bagi mencapai kembali cita-cita politik asal yang dianggap lebih penting daripada gerakan ketenteraan.

Perluasan pusat-pusat massa dilakukan dengan membentuk barisan bersatu yang dibuka keanggotaannya kepada semua kaum dan kelas. Kelas menengah mesti dimenangi dan gerakan antagonisnya melalui taktik kejam terhadap golongan pekerja-petani diberhentikan. 'Tentera Pembebasan' pula memberhentikan tindakan merampas kad-kad pengenalan dan kad-kad catuan barang dari orang ramai, membakar kampung-kampung, menyerang pejabat pos, takungan air, "power stations" dan lain-lain kemudahan awam seperti membinasakan landasan keretapi, dan lain-lain tindakan kejam, termasuk tindakan sabotaj terhadap ladang-ladang dan lombong-lombong.

Adalah menjadi tugas Min Yuen, pertubuhan awam PKM, memenangi sokongan orang ramai. Di bandar-bandar, gerakan indoktrinasi politik diteruskan, kesatuan-kesatuan pekerja harus terus diresapi dan dipengaruhi³² manakala go-

³⁰ Edgar O'Ballance, *Malaya: The Communist Insurgent War 1948-1960*, London, ms. 15.

³¹ J.M. Brimell, *Communism in Southeast Asia: A Political Analysis*, London, 1959, ms. 327.

³² Tetapi menurut laporan kerajaan, "...before the Revolt began, there were 339 Red-dominated Unions registered, this number later shrank to 162". selanjutnya lihat Department of Information, Federation of Malaya, *Communist Banditry in Malaya*, Singapore, 1951, ms. 2.

longan 'borjuis' dari semua kaum di 'pujuk' supaya menyertai gerakan anti-imperialis. Pembunuhan hanya akan dilakukan sebagai senjata; dan akan dilakukan menurut peraturan.

Dilain pihak, mulai tahun 1954, kerajaan telah mengubah taktiknya dalam gerakan menentang komunis. Kemenangan cemerlang Parti Perikatan pimpinan Tunku Abdul Rahman, dalam pilihan raya 1955, memberi kesan yang tidak kecil keatas perjuangan PKM. Ini kerana Perikatan sendiri berjuang diatas landasan untuk mencapai kemerdekaan bagi seluruh Semenanjung dengan segera.

Selepas perlantikannya sebagai Ketua Menteri pada 7 September 1955, Tunku menawarkan pengampunan kepada ahli-ahli PKM yang mahu menyerah diri. Perubahan suasana politik ketika ini, merupakan tamparan hebat kepada PKM. Kejayaan Perikatan membentuk kerajaan sendiri dan perjuangan untuk menuntut kemerdekaan dengan sendirinya menghancurkan perjuangan PKM yang dipanggil 'gerakan pembebasan' itu. Pada hulan Jun 1955, Ch'in Peng menyatakan kesediaannya untuk membincangkan penyelesaian politik dengan pihak kerajaan³³.

Setelah melalui beberapa siri rundingan, akhirnya Ch'in Peng bertemu dengan Tunku di Baling, Kedah pada bulan Disember³⁴. Dalam pertemuan tersebut, Ch'in Peng membayangkan kesediaannya untuk mengakhiri gerakan ketenteraan PKM, sekiranya ini tidak membahayakan kejudan PKM. Bagaimanapun Tunku telah menolak permohonan PKM untuk bergerak sebagai parti politik yang halal³⁵. Inilah sebab yang sering ditonjolkan mengapa Rundingan Baling itu gagal.

Ch'in Peng menolak tawaran menyerah diri dan hanya akan menggantungkan perjuangan bersenjatnya apabila Malaya menampakkan kemajuan untuk mencapai kemerdekaan sebenar³⁶. Kegagalan rundingan itu, membuat PKM kembali berjuang, kali ini untuk menyingkirkan apa yang digelarnya 'kediktatoran borjuis Tunku'.

Bagi mencapai objektif tersebut, polisi perjuangan PKM dikembalikan semula kepada polisi barisan bersatu, dengan tujuan untuk meresapi parti-parti politik, kesatuan-kesatuan pekerja dan badan-badan pelajar. Cita-cita PKM ini dilaksanakan menerusi pertubuhan sulitnya (yang anggota-anggotanya digunakan bagi meresapi pertubuhan-pertubuhan berperlembagaan yang telah sedia ujud), terutama bila tertubuhnya South Johore Regional Committee Policy Directive (iaitu

³³ Pada masa yang sama, PKM mengemukakan Lapan Perkara Rancangan Parti. Dalam mesyuarat AJK pada bulan Nobember 1955, PKM mengemukakan perlantikan 'saudara' Melayu dan India dalam Jawatankuasa tersebut. Musa Ahmad sebagai Pengerusi, Balan sebagai Timbalan Pengerusi, sementara Ch'in Peng sendiri mengekalkan dirinya sebagai Setiausaha Agong. Perubahan ini sebagai untuk menunjukkan bahawa perjuangan PKM didukung bersama oleh semua kaum di Semenanjung. Sementara Rancangan Lapan Perkara, diantara lain menyebut untuk mengujudkan 'a common programme to all nationalities, classes and strata, in their struggle of independence, democracy and peace in Malaya. It embraced even those 'feudal remnants' which had hitherto been bracketed with the Western imperialist as the enemy of people. The only enemy left was the West and its supporters', lihat selanjutnya, *Communism*., *op. cit.*, ms. 12 dstnya.

³⁴ Lihat Tunku Abdul Rahman Putra, *Sebelum dan Selepas 13 Mei*, Kuala Lumpur, 1969, ms. 225-234.

³⁵ Dari 1945-48 PKM merupakan 'legalised party' di Semenanjung.

³⁶ Lihat Lapuran Kertasputih Kerajaan, *The Communist Threat to the Federation of Malaya*, Kuala Lumpur, 1959.

bahagian terpenting bagi South Malaya Bureau of MCP) pada 1955³⁷.

Arahan sulit JKP yang dikeluarkan pada bulan Jun 1958, telah menamakan parti-parti dan pertubuhan-pertubuhan yang harus diresapi oleh penyokong-penyokong dan agen-agen PKM. PKM juga bercita-cita membantu parti sayap kiri dalam pilihanraya, bagi menjatuhkan pengaruh Perikatan.

Apabila pihak Kerajaan melakukan beberapa siri penggelidahan pada bulan Oktober 1958, dari dokumen yang dirampas menunjukkan bahawa PKM telah berjaya mempengaruhi golongan pelajar, terutama dari sekolah-sekolah persendirian China. Beberapa buah pertubuhan pelajar telah diresapi, diantaranya Selangor National Independence League, Patriotic Youth Corps, Malayan National Independence League, dan Youth Study Society. Adalah juga dikatakan bahawa Selangor Students Union pada ketika itu mempunyai hubungan erat dengan seorang anggota JKP PKM cabang Selangor.

Apabila kemerdekaan diistiharkan pada 31 Ogos 1957, PKM mengeluarkan manifesto perjuangan baru, yang diantara lain menyebut,

"To pledge our loyalty as other citizens of our country do, to the Malayan fatherland and to take part in various kind of activities for Malaya's independence, democracy and prosperity, not by means of the armed struggle or violence but by means within constitutional limits" ³⁸

Sebenarnya tidak ada ketentuan bilakah tamatnya pemberontakan kominis di Semenanjung, sekalipun Dharurat telah secara rasmi diistiharkan tamat pada 31 Julai 1960. Oleh kerana kedudukannya yang semakin terdesak akibat dari tindakan kerajaan, PKM telah mengundurkan saki-baki 'tenteratnya ke kawasan-kawasan hutan di perbatasan Thailand.

Pengkalan kominis di sempadan Thailand itu sebenarnya telah ditubuhkan semenjak tahun 1950an lagi, apabila Malayan National Liberation Army (MNLA) — juga dikenali sebagai Communist Terrorist Organisation (CTO) — terdesak ke kawasan tersebut. Pada tahun-tahun berikutnya pula, beberapa unit 'tentera' yang lain dan bahagian propaganda PKM (termasuk Ch'in Peng sendiri), berundur ke kawasan yang mereka namakan 'kawasan bebas' itu.

Betung, yang dikuasai oleh CTO, merupakan pusat terkuat pengaruh kominis untuk sekurang-kurangnya selama 35 tahun³⁹. CTO terbentuk dari 3 regimen: regimen kelapan yang berpangkalan disekitar daerah Sadao⁴⁰, regimen kesepuluh yang bergerak disekitar daerah Weng, dan regimen keduabelas yang bergerak di daerah Betung.

Menjelang tahun 1960an, kekuatan 'pejuang tahan lasak' PKM dianggarkan 500 orang. Bilangan ini dikatakan bertambah dengan pengambilan rekrut-rekrut baru yang kebanyakan dijalankan oleh Malayan Communist Youth League.

³⁷ Cara bagaimana resapan itu akan dilakukan pernah dihuraikan oleh Yong Kuo, Timbalan Setiausaha Agung PKM, yang mati terbunuh pada tahun 1956. Untuk perbincangan lanjut, lihat, *ibid*, Ketika itu Yong Kuo dianggap 'MCP's foremost Marxist theoretician'.

³⁸ *Communism, op. cit.* ms. 13.

³⁹ *The Straits Times*, 6 Februari 1969.

⁴⁰ *The Straits Times*, 24 November 1969.

Sepanjang keujudannya sebagai sebuah parti politik yang berjuang dengan caranya yang tersendiri, PKM telah meninggalkan kesan yang mendalam keatas struktur sosio-politik dan ekonomi Semenanjung sehingga kini. Sepanjang kegiatannya sehingga mencetuskan darurat dari tahun 1948 hingga 1960 itu, pernah disifatkan sebagai pembawa pertukaran yang asas kepada hampir semua aspek kehidupan penduduk⁴¹.

Berlangsungnya zaman darurat itu adalah merupakan ketika mana perlunya dikemukakan satu konsep keperibadian nasional yang sama⁴². Untuk menghadapi keganasan kominis, semua lapisan rakyat harus dipadukan menjadi satu bangsa Malaysia. Soal tidak indahkan perkara-perkara politik hendaklah dihapuskan. Bakal-bakal dan penyokong-penyokong kominis hendaklah disekat dari menyertai kegiatan kominis.

Lahirnya Jawatankuasa Hubungan Antarakaun pada tahun 1948, adalah bertujuan untuk menyatukan perasaan anti-kominis di Semenanjung. Adalah juga dikatakan bahawa penubuhan Persatuan China Malaya (MCA) diantara lain, tujuannya ialah untuk mengadakan tumpuan perhatian pilihan yang lain bagi orang-orang Cina, selain dari PKM⁴³. Jelaslah kepada kita bahawa penubuhan MCA, pada mulanya, menjadi proses pembendung pengaruh kominis dan kemudiannya pula menjadi tumpuan aktibiti-aktibiti politik kaum China.⁴⁴

Keganasan kominis sepanjang waktu Dharurat telah membangkitkan kesusahan dan kesengsaraan rakyat. Iadang-ladang, lombong-lombong dan balai-balai polis merupakan sasaran serangan, disamping serangan keatas pegawai-pegawai keselamatan dan orang-orang awam⁴⁵. Selama 12 tahun itu, sesiapa sahaja dapat membayangkan jumlah wang yang bukan sedikit digunakan untuk mengembalikan keamanan.

Satu taksiran secara teliti tidaklah mungkin dapat dilakukan tetapi jumlahnya pastilah melebihi ratusan juta. Ini mengakibatkan kegiatan ekonomi Semenanjung terhenti, eksport timah dan getah terhalang⁴⁶. Adalah dianggarkan (ketika keganasan sedang memuncak), kerajaan pernah membelanjakan M\$300,000 sehari semata-mata untuk tujuan keselamatan.

Menurut Lapuran Tahunan 1950, kerajaan terpaksa membelanjakan M\$7 juta untuk menyelesaikan masalah penempatan semula, dimana M\$3 juta dari padanya digunakan untuk memberi elaun dan bantuan perumahan kepada setinggan-setinggan⁴⁷. Perbelanjaan yang demikian besar, diikuti oleh kemacetan

41 Kernial Singh Sandhu, "The Saga of Malayan Squatters in Malaya" *Journal of Southeast Asian History*, Vol. VI, No. 1, Mac 1964, ms. 143.

42 K.J. Ratnam, *Faham Perkauman dan Proses Politik di Malaya*, Kuala Lumpur, 1969, ms.22. Lihat juga F.G. Canell, "Communalism and Communism in Malaya", *Pacific Affairs*, Vol. XXVI, No. II, Jun 1953, ms. 105.

43 Zainal Abidin bin Abdul Wahid, "Munculnya Parti-Parti Politik I", dalam Zainal Abidin bin Abdul Wahid (ed.), *op. cit.*, ms. 157-160.

44 J.B.P. Robinson, *Transformation in Malaya*, London, 1953, ms. 194.

45 Anthony Short, "Communism and the Emergency" dalam Wang Gung-wu (ed.), *Malaysia: A Survey*, New York, 1965, ms. 154.

46 Hanrahan, *op. cit.* ms. 79; juga Robinson, *op. cit.* ms. 183.

47 *Annual Report for the Year 1960*, Kuala Lumpur, 1951, ms. 9.

ekonomi negara, menyebabkan berlakunya 'deficit' sebanyak M\$146 juta pada tahun 1953⁴⁸. Projek-projek pembangunan terpaksa diketepikan kerana seluruh tenaga dan wang ditumpukan kepada gerakan menentang keganasan kominis.

Penempatan semula setinggan-setinggan dibawah Rancangan Briggs, jelas membangkitkan beberapa masalah sosio-politik yang kompleks. Dari jumlah semua penduduk di kampung-kampung baru, 86% adalah kaum China, 9% Melayu, 4% India dan 1% lain-lain kaum. Sehingga sebelum tamatnya Dharurat, setengah juta setinggan telah ditenipatkan semula⁴⁹.

Kesan paling jelas dari penempatan semula itu ialah dari segi perkembangan kependudukan. Bilangan penduduk-penduduk China dibandar-bandar meningkat dari 43.3% kepada 73%⁵⁰. Ini memberikan pengaruh besar kepada penguasaan politik di kawasan-kawasan tersebut. Dari hampir 650,000 setinggan yang ditempatkan semula, dikira-kira 550 kampung-kampung baru⁵¹, 80% daripadanya adalah terletak dipantai Barat Semenajung.

Mereka diberi kemudahan seperti sekolah, pasar, pusat kesihatan dan lain-lain kemudahan awam, serta perhubungan dengan dunia luar⁵². Ini membangkitkan rasa kurang senang, dikalangan orang-orang Melayu, yang selama ini merasa dirinya sebagai rakyat yang setia, sanggup mengorbankan nyawa demi mempertahankan negara⁵³ (dan tidak membantu kominis) tetapi masih tetap merana dikampung-kampung mereka, tanpa diberikan sebarang kemudahan moden, seperti yang terdapat di kampung-kampung baru⁵⁴.

Apa yang jelas, penempatan semula setinggan-setinggan ini dilakukan hanya untuk kepentingan semasa. Dari aspek ketenteraan, penempatan ini amatlah mustahak, memandangkan sokongan yang diberikan oleh setinggan-setinggan yang menyebabkan kejayaan kempen kominis itu⁵⁵. Tetapi dari segi sosial jangka panjang, nyatalah kampung-kampung baru itu meninggalkan berbagai masalah yang kompleks dan masih belum terurai sehingga sekarang. Implikasi politik yang jelas kerananya ialah bahawa penduduk-penduduknya mahu dan dengan mudah berada dipihak yang menentang Kerajaan.

Walau bagaimanapun, bagi Gullick kampung-kampung baru itu telah menolong mengembalikan setinggan-setinggan menjadi warganegara Malaya⁵⁶,

48 B. Simandjuntak, *Malayan Federalism 1945-1963*, Kuala Lumpur, 1969, ms. 59.

49 M. Osborne, *Region of Revolt: Focus on Southeast Asia*, Sydney, 1970, ms. 79.

50 Kernial Singh Sandhu, *op. cit.*, ms. 171.

51 R.D. Rennick, "The Emergency Regulation in Malaya", *Journal of South East Asia*, VI, II, September, 1964, ms. 27; juga L.A. Mills, *Malaya: A Political and Economics Appraisals*, Minneapolis, 1958, ms. 56.

52 R.Allen, *Malaysia: Prospect and Retrospect*, London, 1968, ms. 97. Lihat juga John Kerry King, "Malaya's Resettlement Problems", dalam *Far Eastern Survey*, Vol. XXIII, No. III, Mac 1954, ms. 37.

53 Ian Morrison, "Racial Problems in Malaya", dalam *Pacific Affairs*, Vol. XXII, No. III, 1949, ms. 56.

54 Zainal Abidin bin Abdul Wahid, *op. cit.*, ms. 134.

55 Simandjuntak, *op. cit.*, ms. 59.

56 J.M. Gullick, *Malaysia*, New York, 1964, ms. 116.

untuk mencapai kekuasaan politik dan sosial yang lebih luas. Gejala-gejala peninggalannya, jelas ternyata hingga sekarang.

Perjuangan ketenteraan PKM yang disalurkan dalam bentuk kekejaman, menambahkan lagi ketegangan perkauman⁵⁷. PKM yang lebih didominasi oleh kaum China dan pasukan keselamatan kerajaan yang kebanyakannya dianggotai oleh orang-orang Melayu, telah membawa kepada suatu keadaan dimana pertentangan politik diantara penjajah Inggeris dengan PKM menjalar diresapi unsur-unsur perkauman. Perhubungan antara kaum, menjadi semakin renggang dan ini memberikan kesan yang buruk kepada masyarakat kita.⁵⁸

Ketegangan kaum tambah meruncing apabila belia-belia China dan India didalam lingkungan umur perkhidmatan negara, meninggalkan negeri ini, apabila perkhidmatan tersebut dilancarkan pada 1950⁵⁹. Antara Februari dan Ogos 1951 lebih 10,000 belia-belia China lari ke negeri China⁶⁰, dan kapal-kapal ke India bertambah penuh.⁶¹

Antara 1949 dan 1951, hanya kira-kira 200 belia China sahaja tampil kehadapan masuk berkhidmat dalam pasukan Polis. Ini menambahkan lagi kehampaan orang-orang Melayu. Sambutan dingin dari kaum China ini dikritik dan dianggap oleh kerajaan sendiri sebagai sangat mengecewakan⁶².

Pengalaman dari keganasan komunis dimasa Dharurat juga telah menyebabkan kerajaan berhati-hati terhadap negara-negara komunis, terutama sehingga tahun-tahun 1960an. Malaysia hanya memulakan hubungan diplomatiknya dengan negara komunis, apabila kita berhubungan dengan Soviet Russia pada 1968.⁶³

Jelaslah, sepanjang keujudannya, PKM telah meletakkan asas kegiatan politik berparti. Perjuangannya dengan cara yang tersendiri, menyebabkan perlunya ditimbulkan langkah-langkah positif bagi mengatasinya supaya masyarakat berbilang kaum dapat hidup sebagai satu bangsa Malaysia yang padu.

⁵⁷ John Kerry King, *op. cit.*, ms. 39.

⁵⁸ Khoo Kay Kim, *Sejarah Malaysia*, Kuala Lumpur, 1971, ms. 104.

⁵⁹ K.J. Ratnam, *op. cit.*, ms. 22-23.

⁶⁰ Majlis Gerakan Negara, *op. cit.*, ms. 10.

⁶¹ K.J. Ratnam, *op. cit.*, ms. 23.

⁶² Jabatan Penerangan Persekutuan, *Keganasan Komunis di Malaya*, Kuala Lumpur, 1960, ms. 28. Pandangan yang lebih kritis mengenai hal ini, pernah disuarakan oleh Henry Gurney, Pesuruhjaya Tinggi British dari 1948-1951, yang diantara lain menyebut, "... perasaan keciwa telah timbul dikalangan orang-orang Melayu tentang keengganan orang-orang Cina memberi pertolongan. Mereka hanya hidup bersenang lenang dan menumpukan tenaga semata-mata untuk mencari kekayaan", selanjutnya lihat Tan Cheng Lock, *The Reorganisation of Malayan Chinese Organisation*, Singapore, 1951, khususnya Fasal 2.

⁶³ Zainal Abidin bin Abdul Wahid, "Dasar luar: Faktor-Faktor Dalam Negeri", *Jurnal Hubungan Antarabangsa*, Universiti Malaya, Jil. 1, 1973/4, ms. 12.